

奉化縣志卷二十六

人物 孝義

後梁

呂之才

忠義呂家隩人

當貞明元年大疫從兄弟俱亡兄之和復危甚親

黨皆避去之才獨為兄扶持晝夜不寢者十餘日之和病瘥之才

亦無恙父老咸異之

忠義志

宋

王文亮字昭遠曾祖潔祖紳父韶皆為縣令文亮起令龍川遂卒

先是嘗渡浙江有忘白金百兩於舟者文亮最後獨見之留三日

得忘者歸之而去不告以名子周祥符五年進士授司封郎慶厯

間嘗典鄉郡以光祿卿刑部侍郎致仕

康乾志參臨川集

董溱字仲淵陸溥字德光皆以醫名世乾淳間皇子魏王出鎮四

奉化縣志

卷二十六

人物

一

明忽遭疾寒熱互作水漿不納羣醫叢治或云當補或云當表人

人自殊溱至切脈曰此食積所致法當下眾譁然笑之以牴牾罷

去繼召溥往二人值於道問王何疾答曰診脈視證當服感應丹

王與諸醫皆不然故退曰審如君言即假此藥溱探囊與之溥乃

飾以丹砂易名而進再服疾瘥王曰良醫也厚遺之溥曰此藥非

溥所能實董溱之功也王詢其故具以實對王兩奇之皆官為翰

林駐泊世稱董陸義遜云

康乾志

求大猷字仲嘉

忠義裘村人

性好施與濟患難周貧乏修街道飭橋梁

未嘗有吝色嘉定間詔授忠義鄉官糧稅賴以清平葬親於瑞雲

山經營道塗者三載有蛇市之祥鏹金之異孝行格於神明子起

宗字彰叔景定間以監舍襲父職繼宗字承叔有文名

忠義志

董評字公正

連山後畝人

家饒於貲時出其餘以濟人里中藉以舉火

者數十家尤加意貧士俾得賑貸以卒業并建義學延多士爲之

供給焉

李圖南撰墓志

袁鎮

連山棠溪人

讀書好禮嘗從淮南得一進勇校尉即棄去才濟焯

焯而性絕孝父年七十病羸再刲股和藥以進垂絕而復存者十

五年異母兄有虐之者事益敬孝弟之稱無間子得之字孟深河

陽酒官

案康乾志作登進士第石康縣令得之作得之皆誤

清之字仲素麗澤書院山長

澤之字季原稽山書院山長

戴表元袁氏考妣葬碣參歷志案袁泳之鎮次子早夭亦見葬碣康乾

志作本州直學不足據

董方昉字孟陽謹樸好善爲吏時民有以析產訟者謂之曰兄弟

之誼無分至其家勸諭之兄弟愧悔遂式好無尤所司日得錢宰

分甚均自取其惡者歸而投諸耀碑潭後其子孫皆取科第

康熙志

康敬字彥中鄮茅山世宦裔也父維翰迪功郎葬奉化茂林張氏

奉化縣志

卷二十六

人物

二

山敬以成童之年與其伯兄敷扶柩至兆別間泣曰吾不忍遠離

吾親也遂獨留廬墓讀書張氏嘉其孝且俊妻贅之因家茂林爲

奉化人其後子姓誥誥孝讓之風藹然爲鄉黨望

戴表元題獎孝詩卷後

元

陳鑄字象之宋浙西提刑肖孫之曾孫也叔父紹庭早喪無嗣鑄

生甫期月叔母汪氏子之既長痛其母早寡乃訴諸有司請於朝

卒得旌異先是故居燬於火奉母居鄞至正壬辰海寇猖獗登東

宿渡焚掠居民逃竄鑄歸省故里時生母樓氏年老而瞽兄錡他

出惟樓之姪孫瑜在側鑄驚懼失措泣謂瑜曰我母汝祖姑也獨

負力不能勝盍共舁之瑜曰事急矣不脫鞞帽舁之走遂得俱全

於難鑄好學尤精鍼砭凡負疾求療者輒治之不責其報云

嘉靖志

毛良孫父患腹痛濱死良孫密割股託他肉以食之父病尋愈又

陸氏子母病一月危子淬刃批左乳以食之亦愈仇遠稗史

明

汪志銘忠義松 洪武初其兄仁一以乘馬不下巡司門司憾焉旋

誣私販解齏定徒押充家屬慘別志銘願代兄罪父母兩無能主

志銘奪兄桎梏而去閱數載遇赦歸子尹任諸生忠義志

陳敬枯桐 年十三與父同業樵忽有虎攫其父敬攘臂大呼追及

履虎尾以杖擊之虎怒舍其父反攫敬去父屍賴以全而食敬於

青桐樹下血沾樹樹為之枯因名其地枯桐坑時洪武十七年十

一月五日也歷志

沈伯翥字廷鸞忠義爵 諸生永樂間族某殺其父於麻地伯翥飲

痛伺間與其弟同復仇事濟伯翥身自首死於獄忠義志

沈奎字子文忠義爵 補邑禮曹掾有弟三人父卒母李氏曰汝父

奉化縣志 卷二十六 人物 三

夙懷懿行汝兄弟能孝友以承志斯無憾矣由是皆自勵居數十

口庭無競言時謂之四孝友忠義志

六相公者姓鄔氏軼其名鳴雷之高祖也嘗抱布適市見有以偽

金貿他布者知其見給遂曰我布甚佳彼直又貴何不置彼買此

其人大喜即持布去前賣者怒其奪已欲相毆乃笑曰君誤矣此

偽金吾憂君受欺故易之即出示其金投之河人問何不擒之則

曰吾不欲以區區使人冒不韙之名人咸以為長者鄔鳴雷撰傳按此事三

茅志屬之鄔裡

鄔裡字東江六相公之子年十三喪父衰經居廬弔客有非類者

從幄中語曰我翁不習若以杖驅之出及長善料事治家嚴肅若

明廷蕭萬斛令奉每有疑事輒密以詢人有以一茶一菓饋者輒

怒曰奈何污我令益重之子僑號竹泉嘗拾遺金一囊訪其主歸

之又嘗脫鹽賈二人於死年九十五卒孫文旦字宗周號樂川生而坦夷樂施不倦以子鳴雷貴封中順大夫本鄔鳴雷撰傳

周藩號少泉由諸生遊太學任漢州判官嘗署州事前大夫所決獄必爲詳察擬實未減其先裕於貲稱貸不償卒爲折券云康熙志

梁棟材字伯完半亭里人徙居南街天性孝友好古力學重然諾好施予歲

侵大饑量口給粟全活百餘家爲里黨排解紛難年八十六著有

八行錄康熙志

舒暎字子光由弟子員入太學授甯國丞署邑篆撫恤下民凡羨餘贖緩盡行散賑年饑有鬻妻女者出俸贖還之陞益府紀善致仕歸族某以逋課之累受責折足暎憐之爲鬻產代完不責其償

年八十八卒康熙志

陳孟怡北山人壯年因從兄孟康隸軍籍當就役去家甚遠母老子

奉化縣志

卷二十六人物

四

幼將行痛切愁苦孟怡憫之慨然代往數年不還里人編造戶籍以孟怡身在軍戶竟編軍籍至老還家卒不爲白在軍營時有兄孟甯被事發充遠民孟怡力訴其直得免兄弟皆八十餘而卒人共義之子璘生自軍營歸入鄉校登正統十三年進士第官監察

御史康熙志

方德初字孟仁五世同居百口共爨子二人從子十一人以其貲產均分之嘗於凶年爲粥以施貧者道拾遺金俟其人至還之鄰人鄭氏者以貧鬻女爲人婢慨爲代贖自奉甚菲而性樂施予與弟德全俱爲賓飲者二十年人謂其無愧云德初卒年八十八德

全卒年九十九康熙志

宋原亮起潛孫父歿痛哭屢絕復甦雖蔬食必祭祭必哀泣如初喪兄原剛被誣遠役亮未弱冠毅然俱往役所兄病故亮以身代

後遇赦歸有族女弟適同里陳氏陳病疫亮爲調治死爲市棺購地葬之嘗入粟備饑後粟價騰湧以原價出之妻歿或勸其再娶曰吾生三歲喪母不聞有繼母今敢違遺教乎鄉鄰有爭訟者必勸諭令感悟子琰入史館書戒之曰但盡心國事勿以親老家貧爲念生平好竹人稱爲竹軒先生

康熙志

駱子溥字靜之

長壽江口人

父輦字朝儀廣州右衛知事性孝父名鯉

終身不食鯉子溥輦之少子也亦能以孝事親輦晚年致仕歸忽遘閉疾脹痛不可忍用利藥益劇子溥惕然曰是非吮之不可遂稽顙於天願以身代吮之卽通疾乃瘳後三發而三吮之及父歿號泣躡踊哀毀逾常每祭必以嗜好之物薦之未薦不敢嘗吉旦必懸像而拜焉先是五六十餘年有余氏子

金溪白杜人

頗類是其父汝

濟嘗患小便不通子以口漱之而卽瘳

駱譜本戴櫨贈序及任師古賀書

奉化縣志

卷二十六

人物

五

周應遴號明山

城內人

性孝友年逾六旬孺慕依然父病侍奉週歲

如一日善遇諸弟父兄所遺金勿問其多寡鄉人徐天成鬻其田七畝於應遴十餘年矣以窘故更鬻其田於徐宗秀久之宗秀覺將遷天成而質之官應遴謂曰天成以貧故鬻田復律天成以三尺法天成且益貧甯割我田不必問天成也遂割其田半與之有鄉人佔其牆宗黨代爲不平遴謝曰牆以蔽內外不必計爾我也歲歉謂諸佃人曰但輸我縣官租餘勿問有負逋者應遴念其窘戒收逋者勿追呼負者感激謀棄屋以償應遴火其券

周譜

求廷瑛

忠義裘村人

性至孝一日隨父信稔出灌田父遇猛獸被困廷

瑛以鋤擊之復疾呼鄰畔救逐父獲全時年十有四歲時有沈小

漢

棲鳳人

母病危割股以進未愈急采藥於海島遇風舟覆潮泛至

礁得不死餓三日及閩商船過救之回又有卓繼塘

松隩人

親病醫

禱莫效割股以愈忠義志

陸洪字德宏大橋人縣學生母陳氏卒奉柩合葬父原銈墓結廬於

側成化間參政杜謙嘉靖志作桂謙按部行縣以事聞詔旌其門明史參歷志

項穎字廷獻號拙菴御史愷子正德四年歲貢任廣西南甯府訓

導痛父歿於王事母茹貧守節因刻志書史躬習定省不欲暫離

膝下及之任廣中念母春秋高不得侍養未滿三載輒致仕歸子

文字繼周號質齋從父之京又從之南甯扶侍谿谷性謹厚口不

言人過其貸人急輒忘其家之貧遇道殣必掩後以子守安尹順

昌欲迎養曰吾安能為官舍所局又欲入資授秩拂然曰孰與吾

為盛世良民卒之日對家人歛笑畢忽憑几而逝康熙志

王原時字友山節推文葩子性醕謹寡言笑從師授書即通大義

隨父任所父性嚴毅稍有不樂原時即長跪曰得無以兒不孝耶

奉化縣志

卷二十六

人物

六

或終日不去左右務得其歡心及父邁疾湯藥非親嘗不進齋沐

祈禱請以身代父卒喪葬悉遵家禮凡禮賓客接姻族率有規緒

待昆季友愛彌篤晚年幅巾博衣徜徉梓里施藥濟貧鄉閭德之

卒年九十二王譜

鄔孟震號憶川金溪西塢人妻厄於產終身不續娶撫教二子長元介

次元會元會成進士司成戴洵謂其守義隱居有唐徐文楚之風

事聞於朝立坊表之康熙志

袁文信與弟文仁皆慷慨好施與萬厯十六年歲大侵當道募富

戶出粟賑饑文信文仁共輸穀一千石四十四年又饑遠近慕袁

氏名皆枵腹到門量授米穀全活甚眾郡守張文奇邑令喬萬里

賴愈秀皆給扁獎之康熙志

孫祖成號仁所城內人篤行醕謹同父二人異母出季病足不能步

履愛之彌篤事後母無間言父以明經授永嘉卒於學舍徒步扶
櫬歸喪事盡禮與季析產授以腴田女弟亦後母出任母遺以父
俸無難色子四際會際可均有傳

康熙志

任禮讓字遜之自號赤雲萬厯三十五年歲貢授雲和學訓性至
孝痛父在時不能備甘旨親歿不食肉者十有五年與弟析居盡

以產讓焉

康熙志

李國華號繼泉

忠義嶺
下人

縣學生好賙人急族有乏力嫁娶喪葬者

資助之同里戴姓不戒於火國華人給以米又計畝授穀種辛亥
歲大歉有艾婦寓國華鄰視其苦每賑之婦德甚一日以假穀名
而惑以色力拒之仍與以穀去晚年優游林下以詩酒自娛及卒

人爲之建祠

忠義志

戴存貴號蓋吾天性孝友親早喪待二弟誼敦厚愛一切征輸以

奉化縣志

卷二十六

人物

七

身代之叔有遺產頗豐孤纔十歲代爲持籌及長歸之無毫髮染
指族人有急必爲維持調護中夜歎息獲濟而後安歲饑推舖與
人不責其償身居城市而志在林泉忘懷得失每持觴邀月浩歌
終夜以古人自期

康熙志

梁煒字孟雅棟材長子三歲失恃善事後母饑寒暑不出口恐傷
父心撫異母弟極周摯分產取其瘠者以是得父母懽遠近稱之
性耿介寡言虛懷敦朴惡道人之過人有一行之善極口揚之年
未艾輒棄諸生不就試人益高之

康熙志

楊燭字休明

忠義楊
村人

兄弟分爨二昆謂燭曰吾等皆嫡出宜先擇

肥產分三鬮各拈一別以下業貽庶弟燭曰一父所出忍敢異視
乃以拈得者易之鄉之河泊所一嫠婦貧無以生人以聞燭急遣

往濟之其好施類如此

忠義志

林巨桂

忠義桐照人

有孝行親亡廬墓三年性寬厚鄰人奪其田不之

爭能使慚而自讓家有銀盞客某袖之去巨桂未嘗言某卒經年

其子奉以還

忠義志

胡汝梅

長壽胡家壩人

幹辦任俠萬厓間充大同宣府軍門標下從東征

功授把總復就部選除溫江縣主簿初甯波解運斑竹至夏鎮湖

口風浪則人竹無遺汝梅思承役之艱追解之慘遂具狀請折價

五邑咸受其澤云

三茅志

俞有良號慕池幼敦孝友事親謹問視處昆季式好弗以貲產傷

同氣人有犯者絕不與較守中人產自奉儉約隣有求者輒量予

之不責其償義所不受一絲一縷若浼焉三十喪偶不再娶有勸

之者曰吾有二子不替箕裘足矣課長子以耕訓次子以讀孫曾

以儒行著名科第接踵年八十餘卒

康熙志

奉化縣志

卷二十六

人物

八

周三綱字孟彝

城內人

縣學生行止端方不苟言笑出爲伯父後資

產甚饒悉分授諸弟崇禎間學宮頽圯倡議重新獨任勞勩督學

黃鳴俊獎其行

康熙志

董國份字君裕

連山後畝人

敦厚寡言嘗買妾武林女甚悲楚詢知藁

砧尚在爲亟返之并贈以貲夫婦得重聚拜祝而去

康熙志

王洵號濟川補弟子員母病三年衣不解帶兄渙官桃源運糧失

火捐貲代償二十喪偶終身不娶晚以詩書自娛築天乙閣課子

孫里中貧子弟皆令就學一時名士多出其門年八十卒

康熙志

孫舜明字君暘勤儉自克不苟取與晨出東門拾金一囊揭於通

衢失者至還之時尚未有嗣自後連舉五子人以爲還金之報

康熙志

孫近思字子仁號南麓幼習舉業授經黨塾名士多出其門事父

至孝白首猶謹問視雅敦氣誼友人張某親喪貧不能葬以己所
市善地予之人懷其義

康熙志

俞學禮字朝會號立齋孝友性植十歲失母事父扇枕洗滌一軌
於度族有乏嗣者業頗饒倫次及之謝曰予方依吾父有今日忍
爲人後耶爲邑諸生制行端方有鄉人貸穀若干石往取值其婦
邀之入室具酒食詰其夫外出厲色曰焉有若夫不在我自坐食
乎遂取火焚券歸族子爲盜所誣官捕之急連及宗老曰余從子
弟事奚以累遠族乃自出承之令服其義竟不問平生忍詢勝人
犯而不校以名檢自立未嘗濡迹公庭律躬儉素敦大體歲時薦
享必腆潔延師教子敬禮有加生二子長歲薦次成進士

康熙志

宋禹志字允聲號平波弱冠補諸生個儻任俠輕財好施倪家硯
圯邑令鍾有聞議修築禹志力任其事經始之日資用一無所有

奉化縣志

卷二十六

人物

九

禹志出數千錢及廩粟餼工匠夕宿硯上董治巨細皆其指畫素
病羸由是轉劇遂不起臨歿時以硯工爲念且誡勿信浮屠作追
薦卒年四十五

康熙志

王拱奎字君玉縣學生天性醇篤事母極孺慕出入必面亡友宋
某遺子方幼後母弗子之盡括家所有盛四簾潛寄拱奎家數年
其子弗知也後婦死悉還其子有從子不善門戶計凡糧役祭祀
諸大事皆代爲區畫性嗜酒醉則噓笑爲歡與人排解無貴賤長
幼各得其情年六十七卒

康熙志

葛文欽字堯思

金溪泰橋人

弱冠遊庠旋食餼成化間丁壯抽兵文欽

念兩弟俱幼改名充軍投御史項忠幕以文欽有才識信任之越
數年隨御史擒賊部旌其能擢爲淮安營參將三年卒兵民戴之
營葬淮安之東郊山陽令李儼題曰奉川葛參軍墓子元四字南

洋以父從軍於外欲往尋之母顧氏思畢其婚事元四曰焉有父不在而子完娶者遂悵然作別誓不見父終其身不娶艱於路資隨地行乞留陝二年燕京二年旋客山東有告淮安葛參軍墓者往詢得實白諸當事願收骸骨歸山陽令朱瑛力爲勸止乃廬墓三年里人憐其孝爭致膳焉淮安守及山陽令各贈資賦詩

劉應旄字國望

金溪虎嘯劉人

縣諸生讀書娛親能以善養時海寇不靖

聞其父仁宇富夜劫之去應旄隨父至賊舟日夜號泣寢食俱廢賊感其孝得以贖歸父卒讀禮三年有高子羔之行

國朝

呂亨甯字伯清

住石棋盤

同父四人仲兄疾爲文告廟願以身代已而

兄瘳已忽病羸惚惚三歲一日夢青衣者仲之行曰汝已許之矣

遂歿遺孤九齡妻周氏且緝且舂以至成立

周齊曾撰墓誌

奉化縣志

卷二十六

人物

十

周志元字愷先

城內人

性嚴正家貧力學不慕仕進歲除夕有友至

家曰新正之事如何志元曰兒輩措有米數斗酒一罇元旦無事讀書飲酒而已友歎曰爾有子我獨無子元知其意欲分半令持去友曰奈何奪人子養親之具哉辭不受志元入內謀諸婦婦笑曰家無餘物僅一熨斗可持去遂出贈之後志元夫妻相繼卒其三子德勇傭於王氏會其家失竊邑令疑工人擒德勇去將杖之時王氏母年八十餘聞之扶杖趨公庭以杖擊地而言曰此子非他乃周愷先先生之子彼家素清白公不能捉賊而妄污善良乎促德勇起曰速扶我歸令愕然已而獲真賊乃新到軍犯邑令歎曰賢哉王氏之母能知善人而用之不疑賢哉德勇之父能素行孚人雖身死而猶庇其後也

周譜

王時可號華陸爲諸生抱遠志貧不能娶弟早卒婦亦去遺孤二

人僅數齡時可年方壯家居授徒鞠訓二姪爲父爲母爲師一身兼之以至成立遂終不娶後姪王所勸作二天紀邑令王奐嘉其誼爲著表微吟

乾隆志

陳美政字君德

松林固海人

六歲失怙母施氏青年守寡美政事母孝

母嗜馬鮫魚美政常力致之母子不相離者三十餘年康熙初母卒郡守崔因事至固海美政與席焉有馬鮫魚悲哽不食守怪之美政泫然曰此魚母性所愛今見魚不見母矣守歎息良久以母節子孝額贈之

楊天眷

忠義楊村人

父某跛一足嗜酒每騎驢出飲必醉或墮卧於途

天眷漁樵返尋至其處負歸必盥洗更衣上食始自食後母病狂善調護不辭瘁嘗避寇負父扶母走不他顧時以孝子稱

忠義志

王四佐字燧臣

連山柏溪人

好義樂施雍正五年獨建本邑明倫堂八

奉化縣志

卷二十六

人物

十一

年歲凶捐穀千餘石以濟族貧郡城初建育嬰堂捐田四十畝當

道盛稱之

乾隆志
參王譜

周英愈字叔敬號柳塘

奉化後洋人

幼敏慧就鄉塾僅二年遽通書算

明大義以訟女弟家冤知名康熙三年

詔清丈有司不分荒蕪以充舊額邑田荒蕪者三萬餘畝民困於賦流離失所英愈每惻然會撫憲范承謨憫浙地多荒上疏求免朝廷允其奏英愈聞之躍然曰今得遂吾志矣其所親曰功令載地方官上任六月內利弊不報是謂失察則罷職今郡守崔公治甯十年行將遷矣忽報荒田三萬餘畝是不利於彼也必致毒於君英愈作色曰荒田可豁民困蘇矣身死何惜時邑令鄭愷初履任英愈隻身上狀令感其義遂報府府不聽爲直詳各憲不旬日憲委至府崔守大怒立捉英愈至加以酷刑下之獄崔守遂至奉

大張榜文召通邑士庶曰英愈妄報荒田圖負國課吾今就地致其死以爲效尤者戒一時進詞盈數百皆以積荒不報爲寃崔守覽之莫能決正在躊躇間忽得陞遷河南道之信遂喜甚寢其事新太守邱至奉訊荒英愈爲引導所至皆白茅邱曰前守爲一已功名而忘萬民疾苦甚可異焉遂具詳上請奉旨開豁荒田一萬三千餘畝減糧銀千兩有奇

唐禪字鼎聲

剡源公塘人

雍正十二年歲貢博學能文事親克盡孝道

伯父文獻赴廷試歿於京師禪時貧乏奔走五千里外負骸骨步行歸里堂兄鎡早逝禪事嫂吳氏周且摯凡井臼澣濯諸事皆使其妻任勞復令減去鉛華與吳同其服飾督學彭維新聞其行而

獎之

乾隆志參剡源志

梁鎡字韻寶文學墳之仲子也事親能先意養志母陳氏膺危疾

奉化縣志

卷二十六

人物

十一

抱啼身禱歿而葬祭竭情寢食必與父俱一日父偕入郡城得寒疾褻劇鎡衣不解帶者彌月而父獲痊鎡積勞成疾侍父歸值兄又病鎡日事療禱似不知己抱重疴悉脫其妻簪珥爲兄調治兄

愈鎡力盡而卒

康熙志

張縉字紳友號敬齋痛父早亡思以祿養母專心制舉業中康熙五十二年鄉試雍正八年攝泰州小海場事甫到任值歲大侵爲設法全活竈戶無算小海指爲福星秩滿考最擢分司以母老陳情歸里日侍母側間視寢膳夜寐夙興母壽九十有五縉亦年踰古稀孩提之愛老而彌篤人謂之老萊子云

乾隆志

鄔鳳瑞一名文炳字羽皇

長壽禾橋人

少時嘗爲陳錫嘏所賞器稍長

爲帖括功令改試策論刻苦磨勵已復停策論年四十八補諸生遂絕意進取好觀司馬遷班固之書初其族人鳴雷建祖祠及太

平橋兵燹後祠既廢橋亦將圯鳳瑞俱斂錢建復性尤孝友中年喪母每祭必涕泣年六十三居父喪辟踊如禮致病而卒三茅志

徐達禮字永嘉乾隆志以永嘉為名據忠義志改正忠義陶坑人乾隆十年六月在田芸

豆虎攫其弟去達禮追之奮拳搏虎奪其弟歸弟後每指其傷痕

示人曰亡兄生我未嘗不流涕云先是有汪尚鼎忠義松人年一十

有奇嘗扼虎以救父人皆異之乾隆志參忠義志

毛會吉字仲慶剡源石門人賦質醅茂治農樵漸致贏餘時遭荒歲里

族多不聊生會吉煮粥賑飢存活頗眾又就已山開巨嶺建菴其

上使人憩息邑令曹鼎臣顏其門曰太古遺逸乾隆志

鄔秉鈞金溪西塢人官州判性好施與時與顧麟兆捐修文廟並荷當

道嘉獎麟兆字仲謀長壽禾橋人諸生仗義好施賑飢恤貧善蹟甚多

乾隆志

奉化縣志

卷二十六 人物

十三

竺彥恭長壽徒竺人父學祖母陳氏並流山東歷城縣彥恭少依伯叔

為生稍長即誓尋父母以家貧無資不得行勤苦力作積貲若干

緡始束裝就道於歷城縣訪得之然死已久遂負骸骨歸葬故里

時彥恭年當有室因貲盡無力娶妻孤苦而歿

江一椿字孝先長壽後江人家嘗不戒於火母老不能行一椿奮救於

烈燄中既出自慰其母曰吾母在即家事可再計也其事兄也疾

病相扶患難相濟怡怡一室畏敬若賓師江乾一撰傳

何人端長壽南渡人讀書好禮事親定省温清顛沛不廢年十三父歿

事母益謹母年五十病羸刲股和藥以進母病絕而復存越三載

歿躄踊痛哭日夜不息氣絕而終何譜

孫良序號繹庭連山畝人辛酉十二月間粵寇至連山四處擄掠良

序首約鄉里備器械至廿七日慨然徑往誓滅此賊及將戰眾先

潰良序單身入陣力竭遇害祀兩浙忠義祠

毛謙榆字載揚其弟謙杉字三揚其族人裕足字松茂俱剡源石門人俱

有膂力同治壬戌正月有粵匪數千游弋康嶺等處生員毛殿英

與其子武生偉儒起義討賊招謙榆謙杉裕足及各村丁壯近千

人偉儒當先殿英押後至斑溪賊率大隊分兩翼而來偉儒指揮

謙榆等亦分兩翼而往時有毛朝堂者鎗斃其賊目一人謙榆等

三人縱橫痛擊賊退至康嶺三人率眾追殺斬賊首三十餘級至

嶺下畝時已昏黑賊望後軍不繼回馬燃鎗三人持鎗還擊藥怪

罄賊用大旗掩之俱為所戕均入祀兩浙忠義祠剡源志

毛榮濬兩浙忠義錄作榮申字資珠剡源石門山人壬戌正月毛殿英起義討賊募

人分貼檄文無敢應者榮濬毅然請往至松林之排溪為賊謀所

獲釘手足於板送至城中賊將訊何人主兵榮濬堅不肯吐罵曰

奉化縣志

卷二十六

人物

十四

狗賊人人爭欲啖汝肉奚問主兵者為賊以利刃戳其口罵益厲

牽至東門外縛石柱上爭拔其髮且盡血如泉湧然後以亂刀戕

死時正月二十八日也年三十七剡源志民表既列來珠續義民表又列

榮申不知來珠即榮申之字也

鄔友琛忠義謝家人監生壬戌閏八月粵匪掠鄞豐樂鄉進逼忠義各

村團長倡義鳴金遠近響應十一月儲餼糧厲器械更番列守要

隘於鄞界之盤松擊斃騎賊三人步賊數十人友琛銳進賊繞山

後圍之友琛督戰不退受重傷遂死於盤松事聞

賜卹如例是役也同殉者二十餘人先是有裘友蘭者裘村人聞粵

匪至曰吾當往與論理或以愚諷不能止預計必死閏八月八日

告祖先畢祔已木主於祠行至道陳嶺與賊遇友蘭遮道與之言

賊怒語益不遜遂被害兩浙忠義錄及忠義志

鄔孝洪字椿林號慕舜長壽禾家橋人嘗感范氏不為良相當為良醫之

語研索岐黃手一卷寒暑不輟久之盡窺奧竅為人療病輒應手愈有貧而求醫者雖忍饑徒步弗辭性素剛壬戌秋粵寇再陷奉化被擄罵不屈死之祀省郡縣忠義祠

竺高錡長壽徒竺人素豪飲有膽略壬戌八月粵寇陷奉化四出虜掠

強汚村民女高錡毅然大罵脅以刃罵益厲賊怒甚以縣絮裹其身灌油燒之至死罵不絕口時其族人竺欽亦預知賊之必敗有勸之受偽官者輒大罵聞官軍勦賊又率鄉民助之欽字鳳山邑諸生善壬遁術

張正忱長汀人村農也聞官軍勦賊募義民為導乃踴躍肩長梯薄

城中礮死祀兩浙忠義祠

周廷謨號嘯巖長壽周村人粵匪之亂廷謨預設團練延台人善刺擊

奉化縣志

卷二十六 人物

十五

者以教族子弟各村以周氏有團練避難者以千計賊亦以避難者多聚蓄必厚欲得之甘心壬戌閏八月賊大隊至廷謨率團勇拒敵互有殺傷賊勢不支而遁時鄉里以廷謨忠勇全活不下數百人廷謨曰亦幸而賊去吾奉吾何力之有也是役也同日殉難者凡十一人

王正綸字言章號昨亭忠義茅嶼人道光三十年 恩貢家饒於貲嘗

設文萃堂社課集鄉子弟課以文藝獎賞有差族有貧不能娶者數十人俱授以室又嘗割腴田十餘畝以歲入給族之應試及癘獨廢疾之人晚歲善醫術富者施以方貧者給以藥地方吏因事下鄉必問其起居云卒年七十有五子思仲號曙岑府學生工詩

賦著有樂潛廬詩集忠義志

陳宗器號畊棠長壽陳郎埭人監生父居成幼貧旅於京淮間致巨富宗

器生於清江浦年八歲隨父歸居鄉好善清江外王母窮無所依
宗器走數千里迎之歸生養葬祭盡禮并別建一祠以祀之晚年
又建淨香精舍以爲讀書之所集鄉邑名士讀書其中無力者爲
給資焉將卒遺命捨精舍爲義塾并捐田四十餘畝以資蒙養云
李達標字錦帆金溪李師橋人縣學生少失怙侍母病三年不離左右進
湯藥滌溺器躬任其事未嘗遣使他人及歿喪葬盡禮昆季四人
同居十餘年和愛無忤里有不平事經其排解輒罷息及卒宗黨
咸惜之

周聖度號雅菴

長壽周村人

監生生七月父卒越四年嫡母卒事生母

李氏盡孝道卽授室未嘗離母而宿卽訓蒙必於家雖鄰近不以
應聘母晚年病癱起伏步履痛楚萬狀聖度日夜呼號齋禱於神
疾復變麻木聖度念母盛年得疾嘗禱佛而愈於是立誓往天台

奉化縣志

卷二十六 人物

十六

山求佛忽夜夢神告曰明日天台人萬升來醫爾母焉及旦果至
問姓名與夢合因出土藥以療母其疾良已半載得痊其時母卧
病者已八載湯藥鍼灸飲食衣服無不親爲調劑哽噎則撫摩之
痛癢則拳搔之將溲則抱以如廁洗足則持巾以去垢持刀以去
甲母或不憚爲演說稗官故事以爲娛樂凡有施與尤必稱母心
焉居喪哀毀孺慕越明年亦卒年四十三光緒二十四年郡人夏
啟瑜以事聞於

朝得

旌如例

周永年字虞卿

長壽周村人

同治甲子補行辛酉並壬戌 恩科舉人

以輸餉授內閣中書留 京師數月而歸修譜牒建祠宇築鎮波
塘多以已貲助成之光緒庚寅邑人孫鏘等議建試館於會城永

年首捐千金爲之倡

人物 方技

元

嚴興賢字國賓

城內人

謹厚文雅好行陰德精醫術療人不責報謝

本定海之白沙人至正間游藝奉化因卜居焉時州民疫病流行

投劑全活者甚眾孫貞自有傳

黃潤玉撰嚴貞墓志參嘉靖志案嘉靖志及乾隆志俱以貞爲國

賓子誤

董筆潭逸其名或云夜夢筆浮潭上旦往視之果得筆遂以筆潭

名凡畫鷹隼驚濤古木花卉翎毛著色及水墨皆絕倫其署名皆

曰筆憚

康熙志

明

邵真齋

康乾志作邵真松林結埼人

世醫善爲方視人疾以爲不可治者必不

奉化縣志

卷二十六

人物

十七

治而所治必取奇效方孝孺最信服爲作醫原贈之

遜志齋集

陳德成著之後讀書明理於素問靈樞難經傷寒論等書一目不

忘無不究極旨要治人病隨機應變百發百中其祖父皆儒而隱

於醫至德成而醫愈振

黃潤玉宗儒堂記

朱自方號夢菴其先臨江人宦游奉化遂占籍焉自方性冲澹喜

寫水墨山水晚年出入郭熙范寬而自成一家人從而學者甚眾時

樓雍亦嘗師范寬而點染在自方下

嘉靖志參康熙志

卓迪字民逸

忠義松人

恬澹好學善寫水墨山水嘗師朱自方得其

心妙而筆法精緻過之永樂中召至京師兼以篆隸入翰林將授

官而卒南京報恩寺湧壁有迪筆云

嘉靖志參忠義志

王諤字廷直

城內人

嘗師里人蕭鳳盡其術乃肆力於唐宋以來名

家見奇山怪石古木驚湍之類皆盡日模寫之孝宗朝大承寵幸

時上好馬遠畫亟稱曰王諤今之馬遠也武宗朝陞至錦衣千戶
欽賜圖書花帶白金文鏹後以疾乞歸家居八十餘筆力益勁先
時營壙城西與家人訣盛備儀仗親族送至葬所不歸宋思盧鎮
皆師諤思所作山水人物與諤無二鎮字硯溪能畫美人鎮子沛
字小溪亦工畫

嘉靖志參
康熙志

吳國才

禽孝白
巖人

善唐舉之術村有處女國才遇之曰此殆吾婦也

女聞亦願歸之國才貧不事生業饗殮不給俯仰自如家去雪竇
十里許寺僧數周饋之歲除僧命沙彌具一切需餉其家沙彌偶
忘之入暮始燃炬負擔度嶺失跌傾其半先是國才歸婦謀卒歲
日積日從貸歲當何向國才取鏡自照云無憂行至矣抵暮不至
再理鏡則曰已減半恆自樂以慰其妻生平不喜以相術售有叩
多不應或抱痛祈決生死第爲語生死久近百不失一嘗訪舊人不

奉化縣志

卷二十六

人物

十八

值從其孫索紙筆留書而去其人歸孫曰頃有吳叟留書曰此吳
國才先生也風鑿最妙久遊始回相汝色汝婦有粉骨碎身之災
其慎之及期俾婦晏坐深室竟日不出抵暮食既至廚啟檻取水
虎爪之入山其神異多類此先亦不知其術從何授也後入郡見
袁珙大異之授以術時珙有子方在髻又奇之咨嗟自喜曰吾道
乃在此若父子必當英主恩寵第願弗洩有我爲我累比珙遇成
祖問術神如此從何所授珙以國才對遣安車徵之與語大悅錫
以官國才以福薄辭不旬日乞骸骨珙力請得放還山急取鏡視
曰惜遲一日不得正首邱果至西壩卒於舟去其家一日程云

徐時

進撰傳
參歷志

王貴字天爵

長壽浦
口人

以星術聞憲宗朝授鴻臚寺序班

嘉靖
志

俞承春號桃源

北山
人

攻兒醫兼治損傷多效市藥不計直子應霖

弟承麻號鳳山承麻子應震世其業

應子濤號惠泉應家山人精醫子德揚孫惟聖皆能世其業

國朝

周顯揚連山人嘉慶十五年右榜舉人以善射名能於百步外射

中雀目與友遊山見柿實下垂張弓射其蒂即應弦而墜再射再

中無不得心應手遊京師聞其名者欲一覘其技嘗於夜間爇香

令射每射必截其炷處見者無不稱歎時有周神箭之目

嚴瑞雯字燦雲號煉石城內人習岐黃業凡割皮解肌訣脈結筋得

不傳之秘時楊制軍經奉其書記曹某墜馬折脛邑令陳延瑞雯

治之不日愈旋有揚州僧與邑人鬪傷足骨他醫治之足能履而

跛僧訟之官復延瑞雯為斷其接處別用法接之足端正如故邑

令益奇其術以秘授青囊四字贈之嚴譜

奉化縣志

卷二十六

人物

十九